

欽定天文正義

欽定天文正義卷四十九

軫宿占

軫宿占

史記天官書軫為車主風索隱宋均云軫四星居中又有二星為左右轄車之象也軫與巽同位為風車動行疾似之也宋史天文志軫宿四星主冢宰輔臣主車騎主載任有軍出入皆占於軫又主風占死喪明大則車駕備移徙天子有憂就聚則兵起轄二星傳軫兩旁主王侯左轄為王者同姓右轄為異姓星明兵大起遠軫凶轄舉南蠻侵車無轄國有憂觀象玩占軫四星曰天車主車騎任載盜賊戰伐之事亦為喪車轄轄之象主死喪四星為天四輔冢宰之官主察殃咎知凶災水星也其右星北上十三尺為日月五星中道軫東

一小星曰左轄西一小星曰右轄一曰北星曰轄南星曰膏
皆去軫七寸一曰轄去軫五寸膏去軫一尺為常軫中一小
星曰長沙為木棺主壽命又主因亡軫星明大則法駕備車
馬用動搖則車騎動轄星欲其近軫去軫近則上下和睦遠
則君臣相疑七寸以下為近一尺以上為遠轄欲小而明不
欲大而明小而明則國祚安明而大與四星等則兵起微暗
則諸侯有憂星亡則天下傾轄進退則車騎發復其所則車
騎罷有兵在外而轄遠軫兵亦罷轄舉則南夷內侵動搖則
兵車動長沙小而明則主壽昌微暗則國有憂明大與四星
等則臣下謀逆兵亂乃生星亡不見則人主惡之

天文會通軫四星轄二星在軫兩旁左轄與軫並明同姓有叛謀右轄與軫並明異姓有叛謀

按軫宿四星其最北一星亦在黃道南十二度強月五星皆不及犯觀象玩占謂其右星北上十三尺為日月五星中道蓋指第一星而言較今測差少一度

彗孛客星見軫宿

晉書天文志星孛於軫占曰天下兵起軫又楚分也

宋史天文志彗星犯軫為兵為喪色赤為君失道又曰天子起兵王公廢黜星孛於軫亦為兵喪又曰下謀上主憂客星犯軫為兵為喪入則有土功糴貴諸侯使來出則使諸

侯守之邊兵起民饑守轄軍吏憂

觀象玩占彗孛出軫兵滿宮闕一曰臣犯上天下兵起一曰天下有走玉彗孛犯軫有大喪客星出軫輕車出石氏曰天子使人以車賜諸侯一曰白衣自立大國有喪兵起赤星出軫國兵出客星入軫輕車入石氏曰諸侯有使來以車為幣郝萌曰土功興五穀大貴客星守軫天下人災兵起車馬有急行一曰車馬貴石氏曰川谷不通甘氏曰國有自立者一曰小國自立大國多害一曰天下有山崩大川溢邊地有大兵軍吏憂星色赤黃有外憂蒼黑內有讒臣客星入軫犯長沙天下無處士有逃王出之則兵散

天文會通彗星犯軫宰相惡之彗出軫中光芒向外侵左轄其國有同姓之憂亦主臣異謀星孛於軫芒角指左右轄其國有自立侯王星孛於軫芒角射軫中其分臣下有異謀亦主婦人干朝政星孛於軫中其野將相死客星使星也石申言使星出軫車騎入境亦曰車騎盈郊野客星乘凌軫其國有兵火亦曰有臣不臣之象客星乘軫左轄其國同姓諸侯不遵王命乘軫右轄其下臣不受制

流星出入軫宿

宋史天文志流星犯軫有兵起亦有喪不出一年庫藏空春夏犯之為皮革用秋冬為水旱不調

觀象玩占流星出軫內使出軫外使入以色占之流星入軫色赤黑大臣憂色白相死流星入長沙有兵天文會通流星入軫光芒及丈若蛇行其國有兵火流星出軫遣使求賢

雲氣出入軫宿

觀象玩占蒼白雲氣入軫王者不可行幸宮觀出之其禍除黃白雲氣潤澤入軫諸侯入貢以車為幣出軫天子以車賜諸侯赤雲氣入軫兵從中起赤雲氣如波揚入軫車庫火災兵且起有喪赤雲氣出軫將出兵行白氣入軫有喪黑氣入軫大人憂黑氣四散入軫若回繞之大水車不用

長沙

天文會通赤氣出入軫下有暴兵蒼白氣入軫太常之官憂

史記天官書其旁有一小星長沙

按其承上文指軫言

正義長沙一星

在軫中主壽命占明主長壽子孫昌也

天文會通長沙一星司壽算

按長沙一星在黃道南十八度強月五星皆不及犯

彗孛客星見長沙

天文會通彗孛客星入犯長沙人多夭折

流星出入長沙

天文會通流星入犯長沙人多夭折

青邱

宋史天文志青邱七星在軫東南蠻夷之國號星明則夷兵盛動搖夷兵為亂守常則吉

觀象玩占青邱七星主東方三韓之國南夷蠻貊之星也其星明大則四夷有兵動搖芒角則蠻夷叛

按青邱七星其最北一星亦在黃道南二十六度強月五星皆不及犯

彗孛客星見青邱

天文會通彗孛客星入犯青邱蠻夷侵掠邊境客星守之土官有事

流星出入青邱

觀象玩占流星入青邱蠻夷來歸中國

天文會通流星抵觸青邱蠻夷遣使入疆

雲氣出入青邱

天文會通青赤雲氣出入青邱三夷有兵白雲氣出入之三

夷內亂

軍門

宋史天文志軍門二星在青邱西一曰在土司空北天子六軍之門主營侯設豹尾旗與南門同占星非其故及客星犯之皆為道不通

觀象玩占軍門二星移徙則軍道不通

器府

宋史天文志器府三十二星在軫宿南樂器之府也明則八音和君臣平不明則反是

土司空

宋史天文志土司空四星在青邱西主界域亦曰司徒均明則天下豐微暗則稼穡不登

觀象玩占土司空四星在軍門南主土功主九域地界正疆理辨風土均職貢來遠人其星均明則天下大同暗小則德政不修遠人離叛

按軍門器府土司空三座宋史載在軫宿晉志隋志載在二十八宿外儀象志及儀象考成俱無

欽定天文正義卷五十

星雜變占

星雜變占

星晝見

隋書天文志星晝見若星與日並出名曰嫁女星與日爭光武且弱文且強女子為王在邑為喪在野為兵又曰臣有姦心上不明臣下從橫大水浩洋又曰星晝見虹不滅明星奪日光天下有立王

觀象玩占恒星晝見兵喪俱作又曰星晝見虹蜺從橫臣奪主明

恒星不見

左傳恒星不見夜明也

史記天官書星者金之散氣本曰火星衆國吉少則凶

隋書天文志恒星者在位人君之類不見者象諸侯之背叛
不佐王者奉順法度無君之象也又曰恒星不見主不嚴法
度消又曰天子失政諸侯橫暴又曰常星列宿不見象中國
諸侯微滅也

星闕

隋書天文志星闕天下亂

星搖

隋書天文志星搖人衆將勞

星隕

左傳星隕如雨與雨偕也

史記天官書星墜至地則石也河濟之間時有墜星

隋書天文志大星隕下陽失其位災害之萌也又曰衆星墜人失其所也凡星所墜國易政又曰星墜當其下有戰場天下亂又曰奔星之所墜其下有兵列宿之所墜滅家邦衆星之所墜衆庶亡

開元占京房曰星以春三月墜歲凶不登秋三月墜兵起又曰歲大飢大殃則星墜為粟豆

觀象玩占星隕如雨民去其土也星墜為石其國兵敗軍憂一曰所墜有大兵流血星墜為鳥獸其下有兵星墜為蜚

星變色

彘其國將亡星隆為金鐵有大兵星隆為土有大水一曰大
飢兵起星隆為水其地兵飢星隆為草木有兵其國亡星隆
為人而言吉凶如其言星隆如龍其國有喪星隆為沙兵大
起一曰大飢星隆為肉天下亂星晝隆其下有大兵覆師喪

觀象玩占天星晝赤而無光國有喪天無雲則用此占

欽定天文正義卷五十一

瑞星占

瑞星占

觀象玩占瑞星五行冲和王相喜合之所生也必出於有道之國

景星

史記天官書天精而見景星景星者德星也其狀無常常出於有道之國

晉書天文志景星如半月生於晦朔助月為明或曰星大而中空或曰有三星在赤方氣與青方氣相連黃星在赤方氣中亦名德星

觀象玩占景星王者德至於天則見李淳風曰景星生於

晦朔或出於西北天門之上或入月二三日或出月二十七
八九日狀如星而中空如魚星而不明或青赤白三氣聚如
星如半月狀出而不行必於四時王相日見

格澤

漢書天文志格澤者如炎火之狀黃白起地而上下大上銳
其見也不種而獲不有土功必有大客觀象玩占李淳風曰
格澤如炎火上黃下白從地而上形如楯竿如天狗濯澤而
明見則有大客客者外國之貴使來歸者也

歸邪

史記天官書如星非星如雲非雲命曰歸邪歸邪出必有歸

國者

晉書天文志歸邪如星非星如雲非雲或曰星有兩赤彗上向有蓋下連星見必有歸國者

觀象玩占晉志歸邪入瑞氣以其狀言之則星而非氣也故徙以入此

周伯

晉書天文志周伯星黃色煌煌然所見之國大昌觀象玩占周伯星晉志以為祥隋志以為妖未知其旨今仍存之李淳風曰周伯大而白色如太白光瑩如月照地明或有芒角煌煌然而行或如水星赤色而光潤或黃如橘皆出而不行

含譽

晉書天文志含譽光耀似彗喜則含譽射

觀象玩占李淳風曰含譽似彗有尾而不長亦不甚有光行而不急

宋史天文志景星德星也一曰瑞星其名各異曰周伯曰含譽曰格澤曰歸邪曰天保皆五行沖和之氣所生也其王蓬為元侯昭明景昌句始司危菟昌地維域光之類亦皆為瑞星然前志以王蓬為已下星為妖星又奇星古無所考見於仁宗英宗之時故附於景星之末云

大獻通考中興天文志瑞星有十二一曰景星

一名德星

二曰周

伯三曰含譽四曰王蓬芮五曰格澤六曰元保七曰昭明八
曰昏昌九曰旬始十曰司危十一曰莧昌十二曰地紐減光
然考之晉志瑞星止四星其周伯又於客星見之無王蓬芮
而客星則有王蓬絮芮所至之國非福也而三家所言妖星
則別有蓬星焉曰蓬芮曰蓬絮芮曰蓬星其言禍福不同豈
各有據乎並存之又晉志無元保以下七星其昭明司危地
紐減光則皆為妖星若隋志則因晉志而又無格澤疑當從
晉志

觀象玩占拾遺掾稽星有四星狀類墳墓見則大稔龍枝星

其狀如枝出則王者多于孫靈芝星狀如芝草見則天下太平將相星有二星並見大小相逐見則大臣有文武之德分霞星二星並出光芒相射見則其分外國進寶物於朝

按史記天官書漢天文志皆無瑞星之名以晉隋志考之則皆以景星為瑞星矣格澤星晉志以為瑞隋志以為妖通考謂當從晉志歸邪晉志入於瑞氣玃占從入瑞星晉隋志又皆以周伯含譽為瑞星而周伯又見於客星晉志客星周伯占吉隋志客星周伯占不吉玃占仍存周伯於瑞星今皆從之

欽定天文正義卷五十二

妖星占

妖星占

隋書天文志妖星者五行之氣五星之變各見其方以為殃
災各以其日五色占知何國吉凶決矣行見無道之國失禮
之邦為兵為饑水旱死亡之徵也又曰凡妖星所出形狀不
同為殃如一其出不過一年若三年必有破國屠城兵士亂
行戰死於野積尸從橫餘殃不盡為水旱兵饑疾疫之殃又
曰凡妖星出見長大災深期遠短小災淺期近三尺至五尺
期百日五尺至一丈期一年一丈至三丈期三年三丈至五
丈期五年五丈至十丈期七年十丈以上期九年審以察之
其災必應

彗星

漢書天文志歲星贏而東南石氏見彗星甘氏不出三月迺生彗本類星末類星長二丈

晉書天文志彗星所謂掃星本類星末類星小者數寸長或竟天見則兵起大水主掃除除舊布新有五色各依五行本精所主史臣按彗體無光傳日而為光故夕見則東指晨見則西指在日南北皆隨日光而指頤挫其芒或長或短光芒所及則為災

開元占石氏曰凡彗星有四名一名字星二名拂星三名掃星四名彗星其狀不同為殃如一黃帝占曰彗星出見本

類星長可二三尺其炎如氣黃白孛孛然名孛星見則天下
兵起臣謀其主必有亡國期不出三年又曰彗星出見本類
星長可一丈其炎頭散下垂狀如毛毬名曰拂星見則天下
亂兵大起強臣有謀其君失地近一年中三年遠五年又曰
彗星出見可二丈至三丈形如竹木枝條名曰掃星三丈以
上至十丈名曰彗星彗掃同形長短有差災殃如一 甘氏
曰彗拂箒見則女主有用事者其本為主人又曰彗掃水之
精出而不過一年天下水及有饑星所在宿其邦尤甚又曰
彗星春夏出為饑水秋冬出為人主自將兵若大喪又曰冬
春見為小凶夏秋為大凶 石氏曰掃出狀如有烏赤色

此謂有憂黑者羣臣有賊掃所在之下亡國又曰掃出狀如直竹長二三丈其尾銳白色此謂天下喪諸侯亡又曰掃出狀如直竹長二三丈赤色尾銳此謂出急令見則有兵戰

觀象玩占武密占曰凡彗星短者為饑喪長者為兵亂彗有行者有止者行者事小止者禍大各以其分占之彗見

久者災深去速者災淺赤彗出主滅亡武密占曰凡彗見

赤色者為臣謀叛破軍流血大臣有以家坐罪者一曰彗出

赤色滅五都蒼彗出王侯叛有破軍殺將蒼彗五芒天子

被兵一曰蒼彗出破神明白彗出將軍逆一曰臣專政

黑彗出江河決一黃彗出女主亂彗星氣白而長名曰白

旗喪氣也視其所掃衝破之下必有兵喪其國滅亡 彗星
上白下赤漸長如矛及為兵災 彗星東行而西指海中兵
起西行而東指羌胡入界南行而北指人死且半北行而南
指大水地陷或曰彗星東行而西指吳越兵大起南行而西
北指得柄之國歲大豐東北行而西南指大亂西行而東北
指外兵入北行而南指兵大入西行而東南指強臣為亂
乾坤變異占曰彗北行指南國有大殃禍起西戎亦為大水
東行指南外國人來國中兵起東南行指西北其國大熟西
南行指東北所指國多病六畜死南行指北天下不安不有
大旱即有大水西行指東塞北兵起一曰女子起兵又曰彗

出坎指南大水且大旱出乾天下起兵指東南所出所指國
大亂人多病死大兵大旱 二彗見天下一歲再赦一曰五
流滿道一曰君臣相伐君弱臣強 三彗俱出男子多死
四彗俱出天下主亡一曰四彗相連外指所出之國大昌
五彗並出裂土稱王舊國主死國亡 彗星晝見所臨之國
為河 彗出四尾天下之人逃亡無所 兩軍相當而彗見
得本者勝隨所指伐之利 彗星犯月五星兵喪並起四夷
交侵百姓遑遑若有軍必大戰破軍殺將 凡彗星所列舍
當先知逆順入宿深淺去之遠近守之久速觀其五色察其
動靜 黃帝占常以五寅之日視彗水中見兩方氣在日旁

則彗將出矣甲寅之日有青方氣在日旁此歲星之精將為彗也丙寅之日有赤方氣在日旁此熒惑之精將為彗也戊寅日黃方氣為填星庚寅日白方氣為太白壬寅日黑方氣為辰星出則災在其分及衝彗星出有衆星圍之臣謀逆大兵亂七年

孛星

漢書五行志董仲舒以為孛者惡氣之所生也謂之孛者言其孛孛有所妨蔽闇亂不明之貌也

晉書天文志孛星彗之屬也偏指曰彗芒氣四出曰孛孛者孛孛然非常惡氣之所生也內不有大亂則外有大兵天下

合謀闇蔽不明有所傷害晏子曰君若不正孛星將出彗星何懼乎由是言之災甚於彗

觀象玩占春秋運斗樞曰星孛東方將軍謀主孛西方羌胡叛兵入中國孛南方天下兵起孛北方夷狄內侵 乙巳占曰彗孛出行歷二十八宿留舍出見百日不去三年應之百五十日以上五年應之二百日以上七年應之

文獻通考中興天文志按申湏公羊杜預郭璞俱以彗孛為一星左氏昭十七年有星孛於大辰魯申湏曰彗所以除舊布新也公羊曰孛者何彗星也文公十四年有星孛於北斗杜預曰孛彗也郭璞釋爾雅曰彗妖星也亦謂之孛綜其實

不然彗字長三星其占略同而其形少異彗星光芒短其光
四出蓬蓬字然彗星光芒長參之如掃帚長星光芒有一
直或竟天或十丈或三十丈宋均注鈎命決曰彗五彗也蒼
則王侯破天子苦兵赤則賊起強國恣黃則女害色權奪於
后妃白則將軍逆二年兵大作黑則水精賊江河決賊處處
起史記彗出東井東井齊分景公以為憂晏子曰君高臺深
池賦歛如弗得刑罰恐弗勝字星將出彗星何懼乎然則字
甚彗也董仲舒曰字者乃非常惡氣之所生也大率字彗為
除舊布新火災長星為兵革事

漢書天文志歲星羸東北石氏見覺星甘氏不出三月廼生
天棊本類星末銳長四尺

晉書天文志天棊一名覺星或出東北方西方主奮爭

隋書天文志天棊或曰天格主滅兵又曰天棊出其國凶不
可舉事用兵又曰期三月必有破軍拔城又曰天棊見女主
用事其本者為主人

天槍

漢書天文志歲星縮西南石氏見攄雲如牛甘氏不出三月
廼生天槍左右銳長數丈石氏槍攄攄異狀其殃一也必
有破國亂君伏死其辜餘殃不盡為旱凶饑暴疾至日行一

尺出二十餘日迺入甘氏其國亡不可舉事出兵出而易所
當之國是受其殃又曰妖星不出三年其下有軍及失地若
國君喪

隋書天文志天槍主捕制或曰捲雲如牛槍雲如馬或曰如
槍

觀象玩占甘氏曰天槍出西南出而易處長數丈左右銳赤
色見則枯骨藉藉

天猾

隋書天文志天猾主招亂又曰人主自恣逆天暴物則天猾
起

觀象玩占天猶如衆馬闕躍曰反光

天衝

隋書天文志天衝狀如人蒼衣赤首不動主減位又曰衝星出臣謀主武卒發又曰天衝抱極泣帝前血濁霧下天下寃

國皇

漢書天文志國皇星大而赤狀類南極所出其下起兵兵強其衝不利孟康曰歲星之精散所為也五星之精散為六十四變志記不盡也

晉書天文志國皇去地三丈如炬火主內寇內難或曰內外有兵喪

隋書天文志機星散為國皇主滅姦見則兵起天下急

反登

隋書天文志反登主夷分

按晉書天文志河圖云歲星之精流為天棓天槍天猾天衝國皇及登蒼曄隋書及登作反登無蒼曄又曰皆少陽之精司徒之類青龍七宿之域有謀反若恣虐為害主失春政者以出時衝為期皆主君微也

析旦

隋書天文志析旦或曰昭旦主弱之符又曰析旦橫出叅耀百尺為相誅滅

蚩尤旗

史記天官書蚩尤之旗類彗而後曲象旗見則王者征伐四方

晉書天文志蚩尤旗其色黃上白下或曰若植葆而長或曰如箕可長二丈末有星主伐枉道主惑亂所見之方下有兵兵大起不然有喪也

隋書天文志旋星散為蚩尤旗或曰蚩尤旗五星盈縮之所生也或曰四方無雲獨見赤雲蚩尤旗也又曰帝將怒則蚩尤旗出又曰唐王反度則蚩尤旗出或曰本類星而後委曲其象旗幡可長二三丈見則王者旗鼓大行

開元占春秋緯曰蚩尤旗見則山崩

昭明

史記天官書昭明星大而白無角乍上乍下所出國起兵多變索隱案春秋合誠圖云赤帝之精象如太白七芒釋名為筆星氣有一枝末銳似筆亦曰日華星也孟康曰形如三足機機上有九彗熒惑之精也

晉書天文志昭明象如太白光亡不行或曰赤彗分為昭明昭明滅光以為起霸起德之徵所起國兵多變一曰大人凶隋書天文志昭明者五星變出於西方名曰昭明金之氣也或曰機星散為昭明又曰西方有星望之去地可六丈而有

光其類太白數動察之中亦是謂西方之野星名曰昭明其出也下有喪出南方則西方之邦失地又曰西方有星大而白有角目下視之名曰昭明金之精出則兵大起昭明下則為天狗所下者大戰流血

開元占荊州占曰鎮星之變為昭明

司危

史記天官書司危星出正西西方之野星去地可六丈大而白類太白

按天官書以司危與五殘六賊獄漢為四野星出非其方則其下有兵衛不利

晉書天文志司危如太白有目或曰大而有尾兩角或曰類
太白數動察之而赤為乖爭之徵主擊強兵見則主失法象
傑起

隋書天文志機星散為司危又曰白彗之氣分為司危或曰
司危星大有毛兩角又曰司危見則其下國相殘賊
開元占荊州占曰司危出則兵起其下為喪

天機

漢書天文志歲星縮西北石氏見梟雲如馬甘氏不出三月
廼生天機本類星末銳長數丈

晉書天文志石氏曰雲如牛狀巫咸曰彗星出西方長可二

三文主捕制

隋書天文志天棓其狀白小數動是為棓星一名斬星主殺
又曰天棓見女主用事其本為主人又曰天棓出其下相棓
為饑為兵赤地千里枯骨籍籍又曰天棓出其國內亂

按晉書天文志河圖云熒惑之精散為昭旦蚩尤之旗昭
明司危天棓赤彗隋書無赤彗又曰太陽之精赤烏七宿
之域有謀反恣虐為害主失夏政

五殘

漢書天文志五殘星出正東東方之野星其狀類辰去地可
六丈大而黃

晉書天文志五殘一名五縫如辰星出角

隋書天文志旋星散為五殘亦曰蒼彗散為五殘故為毀敗之徵或曰五殘五分亦曰一本而五枝也期九年姦興三九二十七太亂不可禁又曰五殘者五行之變出於東方五殘木之氣也又曰五殘星大而白主乖亡或曰東方有星望之可去地六丈大而赤察之中青或曰星表青氣如暈有毛其類歲星是謂東方之野星出則兵起其下有喪出北則東方之邦失地又曰五殘出四蕃虛天子有急兵

漢書天文志六賊星出正南南方之野星去地可六丈大而赤數動有光

晉書天文志六賊形如彗五殘六賊出禍合天下

隋書天文志六賊者五行之氣出於南或曰六賊火之氣也又曰南方有星望之可去地六丈其類熒惑是為南方之野星出則兵起其國亂其出也下有喪出東方則南方之邦失地

獄漢

史記天官書獄漢星出正北北方之野星去地可六丈大而

赤數動望之中青

按漢書天文志名獄漢

按天官書以五殘六賊獄漢與司危為四野星出非其方

其下有兵衝不利

晉書天文志獄漢一名咸漢或曰赤表下有三星縱橫主逐王主刺王出則陰精橫兵起其下動則諸侯驚

隋書天文志熒星散為獄漢又曰咸漢者五行之氣出於北方水之氣也出則兵起其下有喪出西方則北方之邦失地大貢

隋書天文志大貢主暴衝

宋史天文志大貢主滅邪暴兵

熒星

隋書天文志熒星主滅邦

宋史天文志、焰星有三彗、兵出、有大盜不成、又主滅邪、

絀流

隋書天文志、絀流動、天下教主伏逃、

茀星

隋書天文志、茀星在東南、本有星、末類茀、所當之國、實受其

殃、

觀象玩占、為星見其國、兵亂、京房曰、茀星三角、三年消五角、五年消九角、則亂、九年乃消、一曰、茀星本類星、長可一丈、其炎頭下垂、狀如毛拂、見則兵大起、天下亂、強臣謀有走王、

旬始

史記天官書旬始出於北斗旁狀如雄雞其怒青黑象伏豔
集解李奇曰怒當音帑晉灼曰帑雌也或曰怒色青主爭兵
又曰黃彗分為旬始見則臣亂兵作諸侯虐期十年聖人起
伐羣猾橫恣或曰出則諸侯雄鳴

隋書天文志樞星散為旬始或曰五星盈縮之所生也亦曰
旬始妖氣又曰旬始蚩尤也又曰常以戊戌日視五車及天
軍天庫中有奇怪曰旬始狀如鳥有喙而見者則兵大起攻
戰當其首者破死又曰出見北斗天子壽王者有福

觀象玩占元冥占曰有如雄雞其色赤黃其名曰旬始出則

天下有兵其國不寧

擊咎

隋書天文志擊咎出臣下主一曰臣禁主主大兵

按晉書天文志河圖云填星散為五殘獄漢大賁昭星絀
流旬始蚩尤虹蜺擊咎黃孛隋書五殘下有六賊絀流下
有涕星無蚩尤虹蜺黃孛又曰土精斗七星之域以長四
方司空之位有謀反恣虐者占如上

天杵

隋書天文志天杵主祥羊

觀象玩占天杵星狀如太白出五芒見則大旱兵起

天枰

隋書天文志天相主擊殄

伏靈

隋書天文志伏靈主領讒

宋開元占伏靈主領讒

伏靈出天下亂

大敗

隋書天文志大敗主鬪衝或曰大敗出擊咎謀

司姦

隋書天文志司姦主見妖

天狗

漢書天文志天狗狀如大流星有聲其下止地類狗所墜及望之如火光炎炎中天其下圜如數頃田處上銳見則有黃

色千里破軍殺將註孟康曰星有尾旁有短彗下有如狗形者亦太白之精

隋書天文志天狗五星氣合之變出西南金火氣合名曰天狗或曰天狗星有光毛旁有短彗下如狗形者王徵兵主討賊亦曰天狗流五將聞又曰西北方有星長三丈而出水金氣交名曰天狗亦曰西北三星大而白名曰天狗見則大兵起天下饑人相食又曰天狗所下之處必有大戰破軍殺將伏尸流血天狗食之皆期一年中二年遠三年各以其所下之國以占吉凶

後流星內天狗
名同占北小異

開元占河圖曰天狗主候兵郗萌曰星出其狀赤白有光下

即為天狗其下小小有足所下之地必流血國易政

天殘

隋書天文志天殘主貪殘

卒起

隋書天文志卒起見禍無時諸變有萌臣運柄

宋史天文志卒起有謀反主驚亡

按晉書天文志河圖云太白散為天杵天樹伏靈大敗司
姦天狗天殘卒起白彗隋書無白彗又曰少陰之精大司
馬之類白獸七宿之域有謀反若恣虐為害主失秋政者
期如上占禍亦應之

枉矢

史記天官書枉矢類大流星蛇行而蒼黑望之如有毛羽然
隋書天文志枉矢或曰填星之變又曰機星散為枉矢弓弩
之象也又曰黑彗分為枉矢枉矢者射是也枉矢見謀反之
兵合射所誅亦為以亂伐亂又曰枉矢類流星望之有尾目
長可一匹布皎皎著天見則大兵起大將出弓弩用

破女

隋書天文志破女主勝之符

宋史天文志破女君臣憂上下亂

觀象玩占破女星狀類彗芒氣雙出見則大兵喪饑疫並起

拂樞

隋書天文志拂樞動亂駭擾無調時又曰拂樞主制時

滅寶

隋書天文志滅寶起相得之又曰滅寶主伐之

宋史天文志滅寶主伐亂

繞廷

隋書天文志繞廷主亂孽

按晉書
廷作絕

驚理

隋書天文志驚理主相署

按宋志
署作屠

大奮祀

隋書天文志大奮祀主招邪或曰大奮祀出主安之

按晉書天文志河圖云辰星散為枉矢破女揭樞滅寶繞
廷驚理大奮祀黑彗隋書無黑彗又曰太陰之精元武七
宿之域有謀反若恐虐為害主失冬政者期如上占禍亦
應之

雜妖星

天鋒

隋書天文志天鋒彗象矛鋒天下從橫則天鋒星見

宋史天文志天鋒見則兵起有亂臣

觀象玩占天鋒出必有亂臣戮死於下

燭星

史記天官書燭星狀如太白其出也不行見則滅所燭者城邑亂集解孟康曰星上有三彗上出亦填星之精

隋書天文志燭星所出有大盜不成

宋史天文志燭星主滅邪

開元占廿氏曰燭星出東方其所出者兵不勝出南方有兵王者亡地出西方其國有喪兵勝出北方其所出者兵勝荆州占曰燭星青有憂事不吉赤有華事黃益地白有歡事觀象玩占燭星所出有土功

蓬星

晉書天文志蓬星大如二斗器色白一名王星狀如夜火之光多至四五少一二一曰蓬星在西南長數丈左右見出而易處星見不出三年有亂臣戮死又曰所出大水大旱五穀不收人相食

隋書天文志有星其色黃白不過三尺名曰蓬星又曰蓬星狀如粉絮見則天下道術士當有出者布衣之士貴天下太平五穀成

宋史天文志蓬星出東南方東北方主旱或大水

觀象玩占蓬星色白如粉長不過三尺出則有亂臣有亡國

史記天官書長庚如一疋布著天此星見兵起

四填

史記天官書四鎮星

按晉隋志作填星

所出四隅去地可四丈

晉書天文志四填星出四隅去地六丈餘或曰星大而赤去地二丈常以夜半時出見十月而兵起

隋書天文志四填星見四隅皆為兵起其下

地維咸光

史記天官書地維咸光

按晉志隋志俱作咸光

亦出四隅去地可三丈

若月始出所見下有亂者亡有德者昌

晉書天文志地維滅光出四隅或曰大而赤

隋書天文志地維滅光者五行之氣出於四季土之氣也又曰四隅有星望之可去地四丈而赤黃騷動其類填星是謂中央之野星出東北隅天下大水出東南隅天下大旱出西南隅則有兵起出西北隅則天下亂兵大起

女帛

隋書天文志女帛者五星氣合變出東北水木氣合也又曰東北有星長三丈而出名曰女帛見則天下兵起若有大喪

盜星

隋書天文志盜星者五星氣合之變出東南火木氣合也又曰東南有星長三丈而出名曰盜星見則天下有大盜多寇

賊

積陵

隋書天文志積陵者五星氣合之變出西北金水氣合也又曰西南有星長三丈名曰積陵見則天下隕霜兵大起五穀不成人饑

開元占積陵見則其下隕霜兵水並起

端星

隋書天文志端星者五星氣合之變出與金木水火合於四隅又四隅有星大而赤察之中黃數動長可四丈此土之氣

効於四季名曰四隅端星所出兵大起

開元占石氏曰端星所出有土功

昏昌

隋書天文志有星出西北氣青赤以環之中赤外青名曰昏昌見則天下兵起國易政先起者昌後起者亡高十丈亂一年高二十丈亂二年高三十丈亂三年

萃星

隋書天文志萃星

按萃星宋志作華星

出西北狀如有環二名山勤一

星見則諸侯有失地西北國

觀象玩占華星出四隅狀如環見則其方諸侯失地

白星

隋書天文志如星非星狀如削爪有勝兵名曰白星白星出
為易喪

菟昌

隋書天文志西北菟昌之星有赤青環之有殃有青為水此
星見則天下改易

濛星

隋書天文志濛星夜有赤氣如牙旗長短四面西南最多又
曰刀星亂之象又曰徧天薄雲四方生赤黃氣長二尺乍見
乍沒尋皆消滅又曰刀星見天下有兵戰鬪流血或曰徧天
薄雲四方合有人氣蒼白色長三尺乍見乍沒

觀象玩占。乃星亦曰隊星。夜有光色如旗。長短四面皆有而南最多。亂兵之象。惡氣也。

按史記天官書。漢天文志皆無妖星之名。其雜星除景星歸邪格澤屬瑞星外。惟天棓等十八星為妖星耳。晉天文志則有彗孛等二十一妖星。後載五星之精散為四十一星而不言占驗。至隋天文志則以彗孛並五星所散三十六星共為三十八妖星。然天官漢晉所有之妖星。轉有不在其內者。又集雜妖十七星以補之。今依晉志歸邪格澤入瑞星外。其餘十五星悉依隋志原本。並以漢晉各占之說附焉。觀象玩占雜妖星又有出於隋志之外者。未詳所

據今不錄

漢京房集星章五緯所生三十五星

天垣星

觀象玩占天垣星在角宿中出月左方日在甲寅歲星將出而不出其與日合二十日其未出二日必有災雲蒼赤色黑三色厭日之光青色之星所指國消主死正星變色而青期三年

天樓星

觀象玩占天樓星在亢宿中出月左方日在甲寅歲星將出而不出其與日合三十日其未出三日必有災雲蒼赤黑色

三物厭日之光青色之星有兩青方其在旁出而生天棧之星長八丈若八十丈所指之國穀大貴人大饑法星變色而青期三年

天輳星

觀象玩占天輳星在氐宿中出月左方日在甲寅歲星將出而不出其與日合四十日其未出四日必有災雲蒼赤黑色厭日之光青色之星有兩青方在其旁出而生天輳之星長十丈所宿之國有立王若亡地令星變色而青期三年

真若星

觀象玩占真若星在房宿中出月左方日在甲寅歲星將出

而不出其與日合五十日其未出五日必有災雲蒼赤黑色
三物厭日之光青色之星有兩青方在其旁出而生真若之
星長六七尺若六丈所指之國亡地殺星變色而青期二年
若三年

天荊星

觀象玩占天荊星在心宿中出月左方日在甲寅歲星將出
而不出其與日合六十日其未出六日必有災雲蒼赤黑三
物厭日之光青色之星有兩青方在其旁而生天荊之星所
指之國戰不勝主死國亡伐星變色而青期二年

天根星

觀象玩占天棓星在尾宿中出月左方日在甲寅歲星將出而不出其與日合七十日其未出七日必有災雲蒼赤黑三物厭日之光青色之星有兩赤方在其旁而生天棓之星所指之國戰敗亡地危星變色而青期三年

天棓星

觀象玩占天棓星在箕宿中出月左方日在甲寅歲星將出而不出其與日合八十日其未出八日必有災雲蒼赤黑三物厭日之光青色之星有兩青方在其旁而出生天棓之星長數丈所指之國受兵有破軍應星變色而青期一年

右七星皆歲星所生

端下星

觀象玩占端下星在斗宿中出月左方日在壬寅辰星將出而不出其與日合二十日其未出二日必有災雲黑黃青三物厭日之光黑色之星有兩黑方在其旁出而生端下之星所指之國兵大敗將死正星變色而黑期六月若一年

商若星

觀象玩占商若星一名天嵩在牛宿中出月左方日在壬寅辰星將出而不出其與日合二十五日其未出二日必有災雲黑黃青色三物厭日之光黑色之星有兩黑方在其旁出

而生商若之星長三四尺所指之國大水敗兵起法星變色而黑期一年

天杵星

觀象玩占天杵星一曰天林在女宿中出月左方日在壬寅辰星將出而不出其與日合三十六日其未出三日必有災雲黑黃青色三物厭日之光黑色之星有兩黑方在其旁出而生天杵之星長七八尺所指之國軍破將死令星變色而黑期一年

天麻星

觀象玩占天麻星在虛宿中出月左方日在壬寅辰星將出而不出其與日合三十五日其未出三日必有災雲黑黃青

色三物厭日之光黑色之星有兩黑方在其旁出而生天庥之星長七八尺一曰四五尺所指之國破亡殺星變色而黑期六月

天社星

觀象玩占天社一曰天杖在危宿中出月左方日在壬寅辰星將出而不出其與日合四十日其未出四日必有災雲黑黃青色三物厭日之光黑色之星有兩黑方在其旁出而生天杖之星長十餘丈句曲所指之國有兵主死伐星變色而黑期二年

天欃星

觀象玩占天棧星在室宿中出月左方日在壬寅辰星將出而不出其與日合四十五日其未出四日必有災雲黑黃青色三物厭日之光黑色之星有兩黑方在其旁出而生天棧之星長五六尺所指之國破亡危星變色而黑期三年

天英星

觀象玩占天英星在壁宿中出月左方日在壬寅辰星將出而不出其與日合五十日其未出五日必有災雲黑黃青三物厭日之光黑色之星有兩黑方在其旁出而生天英之星長十丈所指之國破軍亡地應星變色而黑期三年
右七星皆辰星所生

白藿星

觀象玩占白藿星在奎宿中出月左方日在庚寅太白將出而不出其與日合十日其未出一日必有災雲白赤黑色三物厭日之光白色之星有兩白方在其旁出而生白藿之星所指之國亡地主死正星變色而白期一年

轅星

觀象玩占轅星在婁宿中出月左方日在庚寅太白將出而不出其與日合二十日其未出二日必有災雲白赤黑色三物厭日之光白色之星有兩白方在其旁出而生轅星所指之國有大喪水災國亡法星變色而白期一年

磨星

觀象玩占磨星一曰磨星在胃宿中出月左方日在庚寅太白將出而不出其與日合三十日其未出三日必有災雲白赤黑色三物厭日之光白色之星有兩白方在其旁生出而生磨星長十餘丈一曰文餘所指之國內亂令星變色而白期一年

林若星

觀象玩占林若星一曰竹筴在昴宿中出月左方日在庚寅太白將出而不出其與日合四十日其未出四日必有災雲白赤黑色三物厭日之光白色之星有兩白方在其旁出而

生林若之星長十餘丈一曰七尺所指之國破亡死喪殺星
變色而白期一年

若彗星

觀象玩占若彗星在畢宿中出月左方日在庚寅太白將出
而不出其與日合五十日其未出五日必有災雲白赤黑色
三物厭日之光白色之星有兩白方在其旁出而生若彗之
星長七八尺所指之國內亂亡地伐星變色而白期三年

彗星

觀象玩占彗星在觜宿中出月左方日在庚寅太白將出而

不出其與日合六十日其未出六日必有災雲白赤黑色三
物厭日之光白色之星有兩白方在其旁出而生彗星長四
尺所指之國內亂亡地危星變色而白期六月若一年

若星

觀象玩占若星在參宿中出月左方日在庚寅太白將出而
不出其與日合七十日其未出七日必有災雲白赤黑色三
物厭日之光白色之星有兩白方在其旁出而生若星所指
之國戰大敗應星變色而白期二年

右七星皆太白所生

蚩尤星

觀象玩占蚩尤星在井宿中出月左方日在丙寅熒惑將出

而不出其與日合三十日其未出三日必有災雲赤青黃色
三物厭日之光赤色之星有兩赤方在其旁出而生蚩尤之
星長十丈或丈餘其下有大戰正星變色而赤期二年

赤若星

觀象玩占赤若星在鬼宿中出月左方日在丙寅熒惑將出
而不出其與日合四十日其未出四日必有災雲赤青黃色
三物厭日之光赤色之星有兩赤方在其旁出而生赤若之
星其下有大戰法星變色而赤期二年

天雀

觀象玩占天雀一曰赤雀在柳宿中出月左方日在丙寅熒

惑將出而不出其與日合五十日其未出五日必有災雲赤青黃色三物厭日之光赤色之星有兩赤方在其旁出而生天雀之星所指之國敗亡令星變色而赤期三年

天惑星

觀象玩占天惑星在星宿中出月左方日在丙寅熒惑將出而不出其與日合六十日其未出六日必有災雲赤青黃色三物厭日之光赤色之星有兩赤方在其旁出而生天惑之星三角若四角長三尺其下旱兵起所指國亡殺星變色而赤期一年遠二年

宮張星

觀象玩占官張星在張宿中出月左方日在丙寅熒惑將出而不出其與日合七十日其未出七日必有災雲赤青黃色三物厭日之光赤色之星有兩赤方在其旁出而生官張之星三角而勾所指之國主死伐星變色而赤期一年

晉若星

觀象玩占晉若星在翼宿中出月左方日在丙寅熒惑將出而不出其與日合八十日其未出八日必有災雲赤青黃色三物厭日之光赤色之星有兩赤方在其旁出而生晉若之星所指之國破亡危星變色而赤期三年若四年

天陰星

觀象玩占天陰星在軫宿中出月左方日在丙寅熒惑將出而不出其與日合九十日其未出九日必有災雲赤青黃色三物厭日之光赤色之星有兩赤方在其旁出而生天陰之星所指之國應星變色而赤期三年

右七星皆熒惑所生

折若

觀象玩占折若出月左方日在戊寅鎮星將出而不出其與日合四十日其未出四日必有災雲黃赤青色三物厭日之光黃色之星有兩黃方在其旁出而生折若之星長五尺所指之國亡正星變色而赤期六年

天拂

觀象玩占天拂出月左方日在戊寅填星將出而不出其與日合五十日其未出五日必有災雲黃赤青色三物厭日之光黃色之星有兩黃方在其旁出而生天拂之星所指之國受兵法星變色而黃期三年

天翟

觀象玩占天翟出月左方日在戊寅填星將出而不出其與日合六十日其未出六日必有災雲黃赤青色三物厭日之光黃色之星有兩黃方在其旁出而生天翟之星四角而向中央有星長四五尺所指之國戰敗令星變色而黃期二年

或三年

天樞星

觀象玩占天樞星出月左方日在戊寅填星將出而不出其
與日合七十日其未出七日必有災雲黃赤青三物厭日之
光黃色之星有兩黃方在其旁出而生天樞之星三角四句
所指之國戰敗殺星變色而黃期二年

天從星

觀象玩占天從星出月左方日在戊寅填星將出而不出其
與日合八十日其未出八日必有災雲黃赤青色三物厭日
之光黃色之星有兩黃方在其旁出而生天從之星長六七

尺所指之國亡伐星變色而黃期二年或三年

天伐星

觀象玩占天伐星出月左方日在戊寅填星將出而不出其與日合九十日其未出九日必有災雲黃赤青三物厭日之光黃色之星有兩黃方在其旁出而生天伐之星所指之國大敗危星變色而黃期五年

天社星

觀象玩占天社星一名天上出月左方日在戊寅填星將出而不出其與日合百日其未出十日必有災雲黃赤青三物厭日之光黃色之星有兩黃方在其旁出而生天社之星天

下大亂所指之國亡應星變色而黃期一年

右七星皆填星所生已前三十五星即五行氣所生皆出於月左右方氣之中以其所生星將出不出日數期候之當其未出之前而見見則有水旱兵喪饑亂所指國亡失地王死破軍殺將

按晉志載京房集星章止著星名不言宿分隋志則水火金水各著其宿惟土星則無宿可附文獻通考以為傳會難信觀象玩占所載獨詳今附於此